

मुख्यमंत्री उमर अब्दुल्ला हों मौसम विभाग आसेआ दिती गेदी चेतावनी दे मद्देनजर बक्ख-बक्ख मैहकमें दिएं तैयारियें दा जायजा लैने आस्तै कल श्रीनगर आहले सिविल सैक्रेटेरिएट च इक उच्ची स्तह दी बैठक लाई। ध्यानजोग ऐ जे मौसम विभाग नै पच्छमी हवाएं च बनी दी ताजा खौदल आहली स्थिति दा असर जम्मू-कश्मीर च अज्जै थमां पौने दे असार दस्से दे न, जेहदे करी बक्ख-बक्ख खेतरें च बरखा ते बर्फबारी होई सकदी ऐ। मुख्यमंत्री हों सबन सारबंधत मैहकमें गी तैयार रौहने लेई आखेआ ऐ तांजे फलें दिएं फसलें गी कोई नुकसान नेई होऐ, जरूरी समेयान दी सप्लाई लोकें तगर बनी रवै ते सिड़कां ते जरनैली सिड़कां बी इस दरान ठीक रौहन। उंनै इस बैठक च इब्बी गलाया जे सरकार दी प्राथमिकता इस दरान पूरी चाल्ली तैयार रौहने दी ऐ, तांजे कुसै बी चाल्ली दे हालात दा सामना कीता जाई सकै।



जम्मू-कश्मीर बैंक ने प्रदेश च पिछले दिनें आए दे हाईं करी प्रभावत लोकें गी राहत पुजाने ते उंदी आबादकारी दे कम्में च मदाद देने लेई 4 करोड़ 10 लख रुपे दी रकम मुखमन्त्री राहत कोष च सैहयोग दे तौरा पर दिती ऐ। बैंक दे मुख कार्यकारी अधिकारी ते प्रबंध निदेशक अमिताव चैटर्जी होरे कल 4 करोड़ 10 लख रुपे दा चैक मुखमन्त्री उमर अब्दुल्ला होरे गी

सौंपेआ। मुखमंत्री होरें एहदे लेई बैंक दी सराहना करदे होई इस नेक कम्मै च सैहयोग देने लेई आभार प्रगट कीता ते बैंक दे प्रबंधकें ते सबनैं मलाजमें दा बी धन्नवाद कीता। मुखमंत्री होरें आखेआ जे इस चाल्ली कुसै बी संस्थान जां इदारें आसेआ सैहयोग देने लेई अगगे औना, इस धेड़यै गी पक्का करदा ऐ जे इस औक्खी घड़ी च हर कोई प्रभावत लोकें दे कन्नै खड़ोते दा ऐ।



Satish- Essential Supplies

जरूरी चीजें-बस्तें गी बिजन कुसै रुकावट दे लोकें तोहड़ी पुजाना जकीनी बनाने लेई खुराक, नागरिक आपूर्ति ते उपभोक्ता मामलें दे मंत्री सतीश शर्मा होरें कल जम्मू च एल.पी.जी. सलेंडरें सने पेट्रोल ते डीजल दी सप्लाई गी बधाने दे निर्देश जारी कीते। मंत्री होरें बक्ख-बक्ख मैहकमें दे अधिकारियें ते तेल कम्पनियें दे प्रतिनिधियें कन्नै बैठक दे दौरान जरूरी चीजें दे भंडारण दी समीक्षा करदे होई एह निर्देश दिते। कल्लै थमां मौसम खराब रौहने मतल्लक मौसम विभाग दी चेतावनी दे मद्देनजर, उ'नें मैहकमें गी बिजन कुसै रुकावट दे जरूरी समेयान दी दस्तयाबी जकीनी बनाने आस्तै बंडु सरबंधी नेटवर्क गी होर मजबूत बनाने दिआं बी हिदायतां जारी कीतीआं।



JK Govt – GST Reforms

जम्मू-कश्मीर सरकार नै जंदी 22 सितम्बर थमां लागू होए दे नमीं पीढ़ी दे जीएसटी सुधारें दी जमीनी सतह उप्पर अमलावरी लेई अपनी कार्रवाईएं गी तेज करी दिते दा ऐ। एह गैह टैक्स प्रणाली गी राश्ट्री सतह उप्पर युक्तिसंगत बनाने दे अभियान दे मूजब ऐ ते उपभोक्ताएं दे कल्याण आहली बक्खी सरकार दी मजबूत वचनबद्धता गी बी दर्शादी ऐ। कुशल ते पारदर्शी ढंगगै'नै इस गैह दी अमल-आवरी जकीनी बनाने आस्तै सरकारै सबनै महकमें जिआं स्टेट टैक्स विभाग, सेहत विभाग, शिक्षा ते उद्योग विभाग सने होरनै विभागें च मानक संचालन प्रक्रियाएं गी अपनाने दा कम्म रम्भी दिते दा ऐ। जिला ते ब्लाक स्तरें पर सरबंधत टीमां, बजारें च निगरानी तेज करडन ते जीएसटी सुविधा केन्द्रें ते क्षेत्रीय हैल्पलाईन आहले नेटवर्क दे राएं हर जिले च नागरिकें गी मदाद उपलब्ध करोआडन।



GST Reforms Leather

सरकार आसेआ जी.एस.टी दियें दरें च कीते गेदे बदलाव करी समाज दा हर वर्ग खुश ऐ। होरनै केइएं चीजें-बस्तें आहला लेखा चमड़े कन्नै बने दा समेयान, जेहदे च बूट-नुक्कां बी शामिल न, पर लग्गने आहले जीएसटी गी 12 फीसद करी दिता गेआ ऐ। ढाई जहार रपे तोड़ी मुल्लै दे बूटें दे जोड़े पर हून छड़ा 5 फीसद गै जीएसटी लग्गोग। इससै चाल्ली चमड़े कन्नै तयार होर दुए समेयान, जेहदे पर 12 फीसद जीएसटी लाया जंदा ऐ, उब्बी इस कटौती करी सस्ता होई गेआ ऐ जेहदे चलदे चमड़े दे बपारी, कारोबारी ते गाहक बी मते खुश न।



JKPSC Exam Restrictions

असिस्टेंट प्रोफेसरों की भर्ती लेई जम्मू-कश्मीर लोक सेवा आयोग (जेके-पीएससी) आसेआ 7 ते 8 अक्टूबर 2025 गी लैते जाने आहले मतेहान दे मददेनजर जिला मैजिस्ट्रेट जम्मू डॉ. राकेश मिनहास होरें जम्मू जिले च स्थापित तय मतेहान केन्द्र दे कोल-कश बंदिशें आहले हुकम लागू करी दिते न। तयशुदा मतेहान केन्द्रें दे 100 मीटर दे दायरे च 5 जां एहदे शा मते लोकें गी किट्ठे होने पर बंदिश लाई दिती गई ऐ। औंदी 7 ते 8 अक्टूबर गी बड्डलै 8 बजे थमां स'झां 6 बजे तोड़ी इ'नें केन्द्रें च मेदवारें दे अलावा होरनें लोकें दा दाखला पूरी चाल्ली बंद रौहग। इस दौरान छड़ा अधिकृत कर्मियें गी गै उत्थे जान दित्ता जाहग ते इस आदेश की उल्लंघना करने आहलें खलाफ कार्रवाई कीती जाहग।



SMVD Yatra Suspension

मौसम दे खराब रौहने बारे मौसम विभाग आसेआ कीती गेदी भविक्खवाणी गी ध्यानै च रक्खदे होई श्री माता वैष्णो देवी श्राईन बोर्ड नै माता वैष्णो देवी जी की यात्रा 5 कोला 7 अक्टूबर तोड़ी स्थगित रक्खने दा फैसला लैता ऐ। उ'आं 8 अक्टूबर गी एह यात्रा परतियै बहाल करी दिती जाहग। बोर्ड मुजब त्र'ऊं दिनें लेई यात्रा रोकने दा फैसला श्रद्धालुएं की सुरक्षा ते सलामती गी ध्यानै च रक्खदे होई एहतियात दे तौरा पर लैता गेआ ऐ।

यात्रियें गी सलाह् दिती गेई ऐ जे ओह् यात्रा शुरु करने कोला पैहले श्राईन बोर्ड दी अधिकारिक
वैबसाईट जां होरनें संचार माध्यमें दे राएं ताजा स्थिति बारे जानकारी हासल करी लैन। श्राईन
बोर्ड नै इस फैसले करी लोकें गी होने आहली असुविधा लेई मुआज़रत जाहिर करदे होई सबनें
गी इस फैसले च सैहयोग देने दी अपील बी कीती ऐ।

